



Dus cussegliers guvernativs ed in deputà: Mario Cavigelli, Marcus Caduff e Martin Jäger (da san.).

FOTOS G. N. STGIER

«Il Grischun ha fermezzas maiestusas»

Grischun Vacanzas: Apéro da Bumaun 2018

DA GION NUTEGN STGIER / ANR

■ **Bunamain be fatschas cuntentas han ins vesì ier tar l'occurrènz annua-la da Grischun Vacanzas. La blera naiv ed ils buns affars dals davos diesch dis èn segn positivs per ina buna stagiun d'enviern en noss chantun.** En il Grischun avain nus strusch ina occurrènz ch'attira uschè blera prominènz sco l'apéro da Bumaun da Grischun Vacanzas. Er ier è stada da la partida la «crème de la crème» dal Grischun per sa laschar ir bain cun rosoli, vin alv e da tuttas sorts piculezzas da mangiar. Persunas da num e pum da l'entir chantun èn vegnidas en la sala da l'Hotel Marsöl a Cuira per far in viva sin il nov onn. Ina giada dapli è il motto stà: vesair ed esser vesì. A pled tar quel apéro da Bumaun è er vegnì *Jon Domenico Parolini*, il cusseglier guvernativ e schef dal departament d'economia publica. El ha ditg als preschents da sa legrar da la buna entschatta da la stagiun 2017/18, dentant per avair vinavant success restan tuttina anc intginas sfidas per il turissem.

■ **La Cuppa Spengler e Dario Cologna** Beneventada è la blera prominènz vegnida da *Martin Vincenz*, il directur da l'organisaziun Grischun Vacanzas. Da cumenzar ina stagiun cun uschè blera naiv, cun ina Cuppa Spengler cun in resun internaziunal e lura cun in *Dario Cologna* en ina gronda furma, quai saja davairas plaschaivel, ha accentuà Vincenz. El ha dentant er fatg attent als Campiunadis mundials da bike che han lieu il mais settember a Lai. Tar quel event haja la Svizra cun «noss» *Nino Schurter* e *Jolanda Neff* gist dus trumfs enta maun, ha

menziunà il directur da Grischun Vacanzas.

Ospitants cuntents

Jürg Schmid, il president da Grischun Vacanzas, ha ditg ch'i saja da gronda impurtanza ch'ils ospitants sajan puspè cuntents ed hajan raschun da rir. Per in giast saja pli empèrnavel da far vacanzas tar in ospitant cun buna luna che da passentar il temp liber tar in ospitant malcontent. Da restar uss inactiv e schizunt sa puser, quai saja alura fatal, ha menziunà Schmid. Per avair in bun futur turistic haja er il Grischun da sa differenziar, sa spezialisar da las autras destinaziuns turisticas e da mantegnair vinavant la qualitad. La schelta da strategia en il turissem saja la suandanta, ha menziunà Schmid: «Meglier u bunmartgà». Quel che na sappia esser meglier stoppia esser pli bunmartgà.

Nagin turissem da volumen

Giasts asiats, quels haja bain er il Grischun da basegn, dentant saja d'esser in pau precaut sin il turissem da gruppas. Il Grischun haja da promover pli fetg e sa concentrar sin il giast individual, saja quai il giast svizzer ubain da l'exteriur, ha punctuà Schmid. Da sa drizzar haja nossa destinaziun al giast che mussia interess per nossa cultura e nossa tradiziun. Il turissem grischun saja na fatg per in turissem da volumen, ditg auter in turissem da massa. Il Grischun saja ina regiun cun ina varietad e cultura, cun muntognas e vals magicas, da l'aua, cunzunt da carstgauns cun passiu e cumpetenza per il turissem ed il Grischun haja fermezzas maiestusas, ha ditg Schmid. Ses giavisch saja cunzunt che tuts hajan dapli speranza en l'avègnir, quai che saja ina buna basa per in turissem da success.



Vesì a l'occurrènz han ins er ils deputads Filip Dosch (a san.) e Reto Crameri.



Stads a l'apéro da Bumaun èn er cusseglier guvernativ Christian Rathgeb (a san.) e cusseglier nazional Martin Candinas.



Martin Gabriel (a san.), il secretari general da la Lia Rumantscha, cun Gion Lechmann, il rector da la scola chantunala.



Segnan per dus buns products: Giovanni Netzer da l'Origen Festival Cultural (a san.) e Renato Fasciati da la Viafier retica.



Da buna luna er ils dus represchents da Hotelleriessuisse Grischun: Ernst Wyrsch e Jürg Domenig (da san.).



Cuntents cun ils affars da las pendicularas tranter Nadal e Bumaun: Marcus Gschwend, Martin Hug e Leo Jeker (da san.).



Ina hoteliera ed in hotelier: Claudia Bundi ed Andreas Züllig.